



arranbela

baztango ezker abertzalea

adierazpen askatasuna!

BAZTANGO EZKER ABERTZALEAK ARRANBELAREN KONTRAKO SALAKETA GAITZESTEN DU

Diario de Noticias egunkariko Baztango kazetariak publiko egin duenez Baztango Ezker Abertzalearen Arranbela blogari irain eta kalteengatik salaketa paratu dio. Arranbelan *Diario de Noticias*ek Aroztegiaren inguruan argitaratutako berri baten faltsutasunak nabarmentzen ziren eta, bidenabar, kazetari horrek Aroztegiako aferan izandako ildo informatiboa kritikatzeko. Guzti horren aitzinean Baztango Ezker Abertzaleak honakoak erran nahi ditu:

- Arranbela.blogspot.com bloga Baztango Ezker Abertzalearen sareko informazio gunea da. Ezker abertzalearen ekimen eta go-goeten berri eman bidenabar Baztango kontu desberdinen agerkaria ere bada eta, izaera herrikoia duten berriei, hitzorduei eta hausnarketei toki berezia egiten die.

- Arranbela.blogspot.com gunea Baztango Ezker Abertzaleak kolektiboki markaturiko irizpideekin egiten da eta blogaren ildoak eta bertan argitaratzen diren berriek erabaki kolektibo horri erantzuten diote. Horregatik salaketaren kausa izan den berria guztiz beregain hartzen du.

- *Diario de Noticias*eko kazetariaren salaketa blogaren kontrako eraso zuzen moduan ulertzen dugu eta adierazpen askatasunaren kontrako ekintza guztiz gaitzesgarri eta larria.

- *Diario de Noticias*eko aipatu kazetariak nahi duenaren inguruan eta nahi duen gisan idazteko eskubidea du, baina eskubide hori bera gainerakoei ukatzen die. Urteetan hainbat gairen inguruan: Erdiz, Aroztégia, herrietako alkatetarak, mutil-dantzak... bere jokabide maltzurra jasaten ibili diren herritar, talde eta eragileek ixilik egotea bertzerik ez dute. Adierazteko eskubidea irudiz berari bakarrik dagokiolako.

- Bistan denez idazteko eta adierazteko eskubidea denena da eta bereziki langileen, herritarren eta inguruaren kontrako eraso larrien garai hauetan, suntsiketa orokor hori jokatu nahi dute herritarrena, taldeena eta eragileena.

- Baztango Ezker Abertzaleak Arranbelaren kontrako salaketa eta jazarpena gogor gaitzesten du. Ez gara ixilduko! Zenbaitzuren liburuak Magnak babesten baditu ere Arranbela libreki ari da, langileen eta herritarren zerbitzurat dago eta horri erantzuten dio.

- Baztango Ezker Abertzaleak salaketa honen bilakaeraren arabera momentuan momentuko erantzuna emanez jarraituko du.

Adierazpen askatasuna!

Baztanen 2012ko maiatzaren 9an.

EREDU PUBLIKO BERRITU ETA INDARTSU BATEN ALDE

Azken hamarkadetan zerbitzu publikoen inguruan alimaleko eraso jasaten ari gara. Guzti hau ideologia neoliberalak bulkatutako testuinguru politikoan gertatzen ari da, botere ekonomikoak menpean hartu dituen klase politikoaren eta komunikabide handien laguntzarekin, eta horretarako eraiki duten diskurtso zurrun eta eztaba daezinarekin. Behin eta berriz aipatu digutena: zerbitzu eta enpresa publikoak pribatizatu behar dira, ez dira eraginkorrak, galbidera doaz...

Denborak zera erakutsi digu: pribatizazioekin egiten den gauza bakarra, interes orokorraren gainetik etekinaren eta irabazi ekonomikoaren logika paratzea da, eta horretarako, etekinak handitzeko, gastuak ttipitu edo sarrerak handitu behar dira, hau da: langileen baldintzak makurtu, zerbitzua kaskartu, kostu batzuk administrazio publikora deribatu, dirulaguntza publikoak eman... Helburua begibistakoa da, langileriaren eta herritarren lan eta bizi baldintzak hondatu, eta horrek dakarren beldurraren ondorioz orain artioako eskubideen murrizketa onargarria egin, langile klasearen eta herritarren erantzuna desaktibatuz. Horrela kapitalismoaren esplotazio harremanak indartzen dira, eta egoera horretatik, klase kapitalistak irabazi gehiago aterako ditu.

Guzti hori modu aunitzetar ematen ahal da, enpresa publikoak salduz, kudeaketa pribatizatuz... Pribatizazioak bulkatzeko aunitzetan erabiltzen duten estrategia zerbitzu publikoak hondatzea da: aurrekontu murrizketa, entxufismoa, burokratizazioa... Halako moduan hondatzen dituzte, ezen hondarean pribatizatzea bertze aukerarik ez dagoela sinistarazten baitigute.

Eredu publiko baten alde egiteak interes orokorra, irabazien logikaren gainetik paratzea erran nahi du. Herritarren beharrak asetu bidenabar, langileen lan baldintzak bermatzen dira, eta horrela, erasoaldi kapitalista honetan jasaten ari garen lan eta bizi baldintzen hondatze orokorraren aitzinean, etekinen logikaren gainetik langileen eta herritarren interesak lehenetsiko dituen antolaketa eredu bat eraikitzen da.

Baldintza horietan, egin dakopribatizazioak berrikus-teaz gain, arlo publikoa indartu behar dela uste dugu, aurrekontuak handiagotuz eta enpresa pribatuei emandako laguntzak publikoratu bideratuz. Halaber, enpresa publikoak helburu sozialekin harremandu behar dira, eta ez pribatizazioen sustapenarekin. Gastu burokratikoak ere murriztu behar dira eta administrazioa arindu. Kudeaketa garden eta herritarren kontrolpekoa bermatu behar da.

UDAL KUDEAKETA PUBLIKOA SUSTATU

Aitzineko testuinguru orokor horretan, bereziki aipatzekoa da udal eremuan gertatzen dena. Hasteko, Nafarroako UPNren gobernu eskuindarrak azkenean hamarkadetan udalen finantziarioa ito du, udalen autonomia ederki estutuz. Gainera, udal agintarien noraez ideologikoak kudeaketa pribatuaren aldeko apostua ekarri du, zerbitzu eta jardura aunitz azpikontratatu. Ondorioz, Baztanen, Giltxaurdi udal kirol instalazioen, zahar etxearen, haur eskolaren, hiltegiaren, zaborren... kudeaketa pribatizatu da, nahiz kasu gehienetan jabego publikoko azpiegiturak edo eraikinak izan. Kasu guztiak elkarren artean desberdinak dira, eta bakoitzak bere aldetik gogoeta berezia beharko luke. Alta, zerbitzu horiek azpikontratatzeko emandako arrazoiak bat, udalarendako merkeagoa ateratzen zela da, baina ez da hala. Gainera, kasu batzuetan zerbitzua bera kinkan gelditu da, edo langileen baldintzak aunitz makurtu dira. Bertzeetan adjudikazioa eskuratze aldera autoesplotazioetik hurbil dauden eskaintzak egitera iristen dira. Aipagarria da, halaber, sektoreko enpresa handien agerpena, Giltxaurdiren kasuan MasQuattro eta zahar etxearenean Idea; biak ere UPNren Nafarroako gobernutik hurbil. Idearen kasuan gainera zahar etxea kudeatzeaz gain, Baztanen udaletxeak ematen duen etxez etxeko zerbitzua eskaintzeko nahaia publikoki agertu du eta hori guztiz onartezina iruditzen zaigu. Oinarritzko zerbitzu sozialak publikoak eta unibertsalak izan behar dute.

Nolanahi ere den Baztanen zerbitzu publikoen kudeaketa ereduari buruzko eztabaida ireki beharra dago. Dagoeneko Giltxaurdi kirol instalazioen kudeaketa egiteko Baztango udaletxeak GILTXAURDI S.L. enpresa publikoa sortu du eta pausu ausart hori txalotzen dugu. Kudeaketa publiko baten alde egin behar da, kalitatezko zerbitzua emanen duena, ekonomikoki bideragarria, langileen eskubideak bermatuko dituen, kudeaketan komunitatearen parte hartzea segurtatuko duena eta gardena izanen dena. Komunitatearen zerbitzurat egonen den zerbitzu publikoa hain zuzen. Hori da erronka, hori da eztabaida.

ERREPRESIO EKONOMIKOA BAZTANEN

Errepresioa, definizioz, politikoki edo sozialki lan egiten duenaren aurka egitea da, normalean bote-rearen eskutik eta gehienetan indar polizialak erabiliz.

Euskal Herrian, zoritxarrez, **ERREPRESIOA** hitza nahi baino ezagunagoa eta hurbilagoa egiten zaigu. Frantziar eta espainiar estatuek beren eskura dituzten aparatu eta tresna guztiak erabiltzen dituzte herri gisa ditugun eskubideen alde zein norbanakoen eskubideen alde jarduten dutenak zigortu eta ixiltzeko.

600 euskal herritar baino gehiago espetxeetan, milaka lagun atxilotuak eta torturatuak, hildakoak, erbesterratuak, ilegalizazioak, bortizkeria poliziala...Hauek dira, zalantzarik gabe, errepresioaren ondorio gordin eta latzgarrienak, baino ez bakarrik. Estatuak, bertzelako tresnak erabiltzen ditu ere, herritarrek euren eskubideak

defendatzera atera ez daitezten. Zigor ekonomikoaz ari gara: neurri errepresibo honen helburua ekimen sozial zein politikoetan parte hartzen duten herritar aktiboak ekonomikoki itotzea da, hurrengo ekimenetan etxean gelditu daitezten. Azkeneko urteetan Baztanen, gure herriko eskubideen aldarriak, Euskal preso eta iheslari politikoen defentsak edota errepresioa bera salatzeak isun pila bat suposatu digu.

Isun guzti hauen batuketa 20.000€ inguruko kopurua ematen du orain arte (eta gehituz doa) eta dagoeneko enbargoak egiten hasi dira.

Honi aitzin egiteko ekimen ezberdinak burutu baldin badira ere (txoznak, zozketak, e.a.) ez da nahikoa izan eta aise gehiago dago egiteke.

Beraz, hemendik aitzinerat burutuko diren ekimenetan **ELKARTASUNEZ** parte hartzeko deia luzatu nahi diogu herritar orori.



MUTIL DANTZAK ETA NESKEN PARTE HARTZEA

Mutil dantzak emaztekiek besten testuinguruan, eta gainerakoan, gizartean jasaten duten bazterketaren erakusgarriak dira. Jendarte patriarkarrean bizi gara sexu-genero sistema zurronek egituratua eta emaztekiak arlo aunitzetan bigarren mailako herritar bihurtu dituen. Mutil dantzetaz eta bestaz ari garenez, bereziki aipatzekoa da bestak bazterreko eta menpekotasunezko tokian bizi izan dituztela andreek, adibidez egunaren zati gehientsuena familiako otordu guztien prestaketan pasatuz, jantziak garbituz eta etxeko lanen bertze eginkizunetan. Aipatzekoa da halaber, bestetako ekitaldietan duten presentzia eskasa: zenbat emakume pilotari, bertsolari, aizkolari edo musikari...daude ? Emakumeak ikusle huts izatera mugatu dituen besta eta jendarte eredia garatu da aspalditik, eta oraino ere hori aise ikusten ahal da. Zentzu horretan, mutil dantzetan gertatzen dena, bestetan neskek bizi izan duten bazterketa historikoaren bertze adibide bat da. Mutil-dantzek mutilen dantza izatetik gizonen eta haurren dantza izatera eboluzionatu dute; herritar guztien dantzak izatera eboluzionatzen ahal zuten nesken parte hartzera irekiak. Baina bestak eta eremu publikoa gizonezkoena den mundu batean hori ezinezkoa izan da, orain artio bederen. Nesken askatasunarekin denok askeagoak gara; eta neskek eremu berriak naturaltasunez berenganatzeko egiten dituzten pausu guztiek, eremu horiek berdinzaleagoak eta libreagoak egiten dituzte. Jendarte, besta eta mutil dantza parekideekin gizarte bidezkoagoa eta justuagoa eraikitzen ari gara eta modu horretan kinto bestak, zikiro jateak, ihauteriak edo orakunde bestak lehen gizonezkoenak bakarrik zirenak, orain denenak dira eta horrekin denok irabazi dugu.

Horrelakoetan eta tradizioa tarteko, tentsio sozialak sortzen dira. Tentsio horiek gehiagora ez joatea guztion ardura da, hau ez da inoren kontrako gauza bat eta, horregatik, zentzuz jokatzera deitzen dugu. Hala giroa gaiztotzeko eta sua pizteko *Diario de Noticias*ek egiten duen lana guztiz salagarria eta axolagabea dela iruditzen zaigu.

EUSKAL PRESOAK EUSKAL HERRIRA

Euskal Herriko egoera politikoa aldatzen ari da eta azken hilabeteetan euskal iheslari zein preso politikoen eskubideen alde izan den jendartearen inplikazio zabalak eta izandako mobilizazio jendetsuek gobernuarengan mugitzeko beharra sortu dute.

Madrilgo gobernuak mugitzera behartua ikusi du bere burua, baina ga-bezi nabarmenak dituen plana aurkeztu du, eta ez du egoerak eskatzen duen seriotasun eta ardurarekin hartzen preso politikoen afera. Izan ere ez dio jendartearen gehiengoaren eskariei eta bake prozesuak berak dituen premiei behar adinako erantzunik eskaintzen. Hortaz, erran genezake gobernuak mugitu egin dela, baina zinez, paus sendorik ez duela eman.

Dispersio politika akitzea; gaixotasun larriak dituztenak libratzea; bizi osorako zigorra ezartzeko neurriak baztertzea, kondena bete dutenak eta



¾ bete dituztenak askatuz; eta isolamendua bezalako neurri krudelak akitzea dira euskal jendarteak eskatzen dituen mugimenduak.

Gainera, gibelkako pausoak ere izan dira, horien artean nabarmenena, 1977/2006 bizi osorako doktrina berretsi izana Auzitegi Konstituzionalak, kondena bete duten presoak kartzelan mantentzeko irizpidea lege bilakatuz.

Bertzetik, plan honek giza eskubideen errespetuari baldintzak ezartzen dizkion momentutik ez du giza eskubideen printzipioa biltzen. Oinarrizko giza eskubideen errespetuari ezin zaizkio baldintzak paratu, pertsona orok, inolako bazterketa eta bereizkeriarik gabe izan behar baititu oinarrizko giza eskubideak ezagutuak eta errespetatuak.

Plan hau kolektibo bati zuzendurikoa dela gauza jakina da, nahiz eta "bergizarteratze indibiduala" azpimarratzen duen. Kontraerran honek nabarmentzen du bake prozesuan beharrezkoa dela gatazkaren konponbidean preso politikoen kolektiboa aintzat hartzea.

Plan honek ez du berehalako konponbidea eskatzen duten egoerendako irtenbiderik ematen. 14 preso eritasun larriekin kartzelan daude, eta horietako batzuk kondena bete izan arren, zigorra luzatzeko doktrinaren ondorioz kartzelan segitzen dute. **Iñaki Erro elizondarra adibidez, egoera honetan aurkitzen da, duela bi urte zigorra osoa bete zuela eta kardiopatia larria duela (hiru sten hiru arterietan).**

Azkenik, Raxoiren gobernuak aurkeztu planak ez du kontutan hartzen dispersioa gehien sufritzen dutenak preso senideak direla eta ehunka senidek milaka kilometro egin behar dituztela astebururo. **Joxemiel Gaztelu elizondarraren kasuan errate baterako, Algeciras-en dute dispersaturik, eta senideek 2400 kilometro egin behar dituzte astebururo bisita egin ahal izateko.** Dispersioak istripu anitz eragiten ditu, senideen bizia bera arriskuan paratuz. Honek erakusten du dispersioak preso senideengan eragiten duen sufrimendua eta arriskua.

Azken hilabeteetan euskal preso politikoen eskubideen aldeko mobilizazio jendetsuek Madrilgo gobernuak pixka bat mugitzeko balio izan dute eta horrek Euskal Herriko eragile eta herritar anitz eta anitz jorratzen ari garen bidearen arrakasta eta garrantzia erakusten du. Honengatik guziagatik, ortziralero Elizondoko plazan arratsaldeko 8etan egiten den euskal preso politikoen aldeko elkarretaratzean parte hartzearen garrantzia azpimarratu nahi dugu, zuri bertara agertzeko gonbidapena luzatu bidenabar.

IÑAKI ERRO

**kondena bete izan arren,
zigorra luzatzeko doktrinaren
ondorioz
kartzelan segitzen du**



Baztanek UEMA behar du

BAZTANEK UEMA BEHAR DU

Euskarak badu eremu teoriko bat: Euskal Herria. Baina egiazki eremu hori bertze hizkuntzen menpe dago. Hego Euskal Herrian, oraindik Espainiako konstituzioren menpe gaude, eta gure hizkuntzak behar duen babesa eduki dezan, gaztelaniaren azpitik gelditzen da. Gainera, Hegoaldean bertan, lurraldeen arabera trataera desberdina du. Ipar Euskal Herrian berriz frantses legearen baitan daude, egoera zailean jarritz euskaraz bizitzeko aukera.

Baztanen, 2010ean Kontseiluak Udalaren barne erabilpenaren neurketa bat burutu zuen; eta neurketa horren emaitzak adierazi zituen: udalaren komunikazio plana eta lanketa sinbolikoa zela, itxurazkoa, nota eskasa ateraz, 5en azpitik. Udalaren konpromiso faltaz Baztango Euskalgintza ere ohar-tu zen. Horren haritik, landu eta proposatu zituen taldeak Baztango Euskara Ordenantzak. Azkenean, 2011ko maiatzaren 2an indarrean jarri ziren Ordenantzak, Nafarroako Aldizkari Ofizialean publiko egin ondoren.

Joan den urtean Udal Gobernu berria eratu zen. Kargua hartu eta berehala sumatu zen euskarekiko ardura sendoa; Ordenantzetan oinarrituz, postu guztien profilak egokitu ziren, idazkariarenetik hasita.. Euskara Batzordea ere berriro indarrean jarri da, modu

parte hartzailean eta iraunkorrean funtzionatuz. Emaitzak begien bistakoak dira; Batzar Nagusiak eta Osoko bilkurak normaltasunez euskaraz egin daitezke, idatzizko eta ahozko komunikazioa euskaraz egin daiteke, udal langileek euskaraz komunikatzeko ikastaroak burutu dituzte e. a. Ordenantzak diona betez, azken finean.

Baina hau dena, nahikoa al da? Bermatzen al du honek baztandarron bizitza euskaraz egin ahal izatea? Kanpoko Institutioek, batez ere Nafarroako Gobernuak, errespetatuko al dituzte Baztanen hartutako erabakiak? Lege nagusiek ez dute behartzen. Eta, orduan zer? Ba, zerbait gehiago behar dela.

Euskarak bere eremu fisikoa behar du, arnas gunea behar du. Eremu horretan jabea dela, nagusia dela, errespetatzen zaiola, eta horren ziurtasuna eta ziurtagiria behar ditu. UEMAk horretarako aukera ematen du. Udalaren lur eremua, euskaraz bizitzeko eremua markatzen du, horren ziurtagiria adierazten du, lege arrotz eta inposatzaileen aitzinean babesgunea eraikitzen du, herritarren borondatea eta hautua irudikatzen ditu. Kanpotik etortzen diren erasoak izugarriak dira. Nafarroako Gobernuaren jarrera ez daiteke inondik ulertu; nafarron hizkuntza babestu beharrean, etengabeko erasoak burutzen ditu. Arrotzen interesak

babesten ditu, bertakoenak gordinki zigortuz, hau aldatu beharra dago, baina bitartean goazen gure eremuan, eta inguruan ere, hesiak jartzera. Hizkuntzaren erabilpena ere kutsakorra da, aldeko nola kontrako jarreretan. Baztanen inguruan, soilik Etxalarrek dauka bere eremua markatuta. Donamariak, Bertizaranak, Urdazubik eta Zugarramurdik ere beren eremuak markatzeko baldintzak betetzen dituzte, UEMAn sartzeko baldintzak. Erroibar, Esteribar, Lantz, Anue eta Ultzaman baldintzak kaskarragoak dira, ahaztu gabe Baigorri aldea, Aihnoa eta Sara ere Baztanen inguruan daudela.

Baztanek bere lurzorua markatzeko, euskara eremu gisa, baldintza guztiak betetzen ditu: %77tik goitu dira euskaldunak, Udala eta Batzar Nagusiaren gehiengo zabal batek euskararen aldeko apustua egiten du. Euskalgintzako taldeek bildutako informazioaren arabera, Baztango herritar gehien-gehienek euskararen aldeko jarrera adierazten dute. Beraz, ia ez dago aitazkiarik jauzi hori ematea eragozten duenik.

UEMAn sartzea ere ez da nahikoa izanzen, baina jauzia izanzen da, behingoan, euskara Euskal Herri guztian normaltasunez erabiltzeko aitortzan. Merezi du.

EUSKARA

HERRITARREN NEURRIKO HIRIGINTZA

Aitzineko legealdiaren hondarrean bartzango Udal Plan berria idazteko prozesua abiatu zuten, Plana idatziko duen taldea zein izanen den erabakiz. Udal Planak hamar urteko iraupena du, eta arras garrantzitsua da, Bartzango hiri-garapena antolatuko duelako eta horren ondorioz, bartzango eremu soziala gauzatu den oinarri fisiko eta materialaren bilakaera zehaztuko duelako: zenbat etxe egin, nolakoak, non egin, eremu publikoak, dotazioak, jarduera produktiboen ezarpena, errepideak...

Hirigintza herritarren interesen aldekoa izaten ahal da, etxebizitza eskubidea bermatuz, eremu publikoak garatuz, etxe hutsei aterabidea emanez, lurzorua zentzuz eta arrazionalki erabiliz... Edo guztiz interes espekulatiboen aldekoa: etxebizitza negozioa egiteko arlorat mugatuz eta merkatuaren logikaren menpean paratuz, lurraldea janez.

Bartzanen 2001eko datuen arabera, azken zentsoa egin zelarik, etxeen %22 hutsik zegoen, eta %15 bigarren bizitza ziren. Bistan denez, denbora tarte horretan eraiki den guztia eraikita, datu horiek aise handiagoak izanen dira. Biztarte horretan ere, unifamiliarrak nolanahi eta nonahi hedatu dira, lurraldearen desgigituraketa eta artifizializazio prozesua ahalbidetuz. Denbora horretan, halaber, Bartzango populazioa 500 pertsona inguru bertzetik ez da hazi.

Hirigintzak badu bereziki kontuan hartzeko alderdi bat: lurra. Lurra mugatua da eta nolanahi erabiliz gero: etxe hutsak, unifamiliarrak, azpiegitura eztabai-dagarriak... ez da bertze deustarako erabiltzen ahal. Modu berean hirigintza ez bada ikuspegi sozialarekin antolatzen, etxebizitza izateko eskubidea bereziki trabatzen da.

Momentu honetan Udal Plana idazteko prozesuan Lurralde Okupazioaren Estrategia eta Eredua (LOEE) zehaztu beharra dago. Gure proposamena da, alde batetik horren gainean eztabaida soziala bulkatu beharra dagoela; eta bertetik, Bartzango herri bakoitzak bere herriari dagokion eredua finkatu behar duela. Eredua finkatzeko eztabaidan eta erabaki hartze prozesuan etxebizitza izateko eskubideak eta lurraldearen erabilera arrazional eta zentzuzkoak oinarritzko irizpideak izan behar dute; gaur egun existitzen diren etxebizitza hutsetan eragin beharra dago eta unifamiliarren gainean ere gogoeta serioa egin behar da. Modu berean Aroztegiaren gisako proiektu espekulatzailak ez dute Bartzanen tokirik izaten ahal eta horregatik lehenbailehen geldiarazi behar dira.



herriarren
neurriko
hirigintza



BEGOÑA SANZBERRO ETA KOMUNALAK



Azken aldian eta kontu desberdinak tarteko Begoña Sanzberro UPNeko Baztango zinegotziaren eta parlamentariaren, herritarrek jakin beharreko hainbat pasarte ezagutu ditugu. Alde batetik berak erabiltzen duen Uzketeko komunalarekin gertatutakoa dugu. 1997. urtean Telefonica enpresak komunal horretako muinoan antena paratu nahi zuela eta, Begoña Sanzberrori joan den otsailaren 25eko Almandozko batzarrean aitortu zuenez 750.000 pezetako ordaina eman zion. Legeak horrelakorik debekatzen ez badu ere komunalen jabeak baztandar guztiak dira eta haren gestio eta gobernu Baztango Batzar Nagusiaren bidez egiten da, hortaz, ez da inondik ere bidezkoa partikularren arteko halako tratuan ibiltzea, Batzar Nagusiari bizkarra emanez gainera. Salagarriena hala ere aipatutako Almandozeko batzarrean egindakoaren apologia edo aldarria egitea da. Hautetsi politiko baten aldetik horrelakoak ez dira ulertzen ahal eta, garai horretan Begoña Sanzberro parlamentaria zela oroitarazi behar da.

Bertzalde, Erdizeko meategiaren aferarekin Begoñaren jarrera ulertzeko akaso, orain gutti, joan den azaroan, Magnak bere jendaki zuzen bat kontratatu zuela argitzea beharrezkoa da. Eta horretan harrigarriena hau da: Magnak kamioilari guztiak autonomo gisa kontratatzen baditu ere Begoñaren jendaki zuzena lantaldean sartu du. Dударik gabe zilegitasun guztia dute horrela jokatzeko eta hori egiteko; baina baztandarrek ere eskubide guztia dute gai baten inguruan eta komunalen gainean erabakitzen delarik mahai gainean dauden elementu guztiak ezagutzeko.

NOR DAGO ISPILUAREN AITZINEAN? NOR DAGO ISPILUAREN AITZINEAN?

NOR DAGO ISPILUAREN AITZINEAN?



Orain bi urte luze Ezker Abertzaleak bere osotasunean Zutik Euskal Herria gogoeta kolektiboaren bidez Euskal Herriaren baketzearen eta normalizazio politikoaren bidean eta Independentziaren eta Sozialismoaren helburu estrategikoetan aitzinerat egiteko, estrategia aldaketa egin zuen eta, horrela, aldi politiko berria abiarazi Euskal Herriaren nazio askatasun eta eraldaketa sozial prozesuan. Gogoe-ta horretan gatazka armatua gainditzeko beharra aipatu zen eta horretarako, Prozesu Demokratikoa izeneko lan ildo abiaturik.

Prozesu Demokratikoaren baitan eta gatazka konpontze aldera bi eremu nagusi bereizten dira. Lehen gatazkaren ondorioei buruzkoa: presoak, biktimak, desmilitarizazioa... Eta bertzea, gatazka-ren izaera politikoari buruzkoa eta horrelakorik errepikatu ez dadin sakonean dauden arazo eta ga-bezi politiko eta demokratikoei aterabidea ematea: lurraldetasuna eta erabakitze eskubidea laburki erranda. Lehen eremua ETA eta estatuen artekoa litzateke, bigarrena Euskal Herriko eragile politiko eta sozialen artekoa. Alta, dagoeneko nabarmen gelditu denez Espainiako estatua lehengo eskema "antiterroristan" bere izaera anti-demokratikoa estaliz eta bere jarrera po-litikoaren ahultasuna makilatuz guztiz eroso zegoen; hortaz, egoera berrian guztiz dese-roso eta inoiz baino ahulago dago. Alde ba-tetik estatu ereduaren krisia bizitzen ari de-lako eta bertzetik krisi ekonomiko gogorra. Baldintza horietan ezinean eta Euskal Her-riari inongo eskaintzarik egiteko ahalme-nik gabe bake prozesua tratatzea da bere estrategia, eta horren adibide garbiena euskal preso politikoekin egiten ari dena. Gainera salbuespen legedia desegin be-harrean Bateragune auziko epaia berrets-i du edo presoei, praktikan bizi osoko kar-tzelaldia ezartzen dien 1977/2006 doktrina onartu. Helburua garbia da: prozesua us-teltzea eta desanimoa eta zatiketak era-gitea. Horren aitzinean Ezker Abertzalea blokeaturik dauden gaietan etsitu beha-rran horiek baztertu gabe alde bakarrekiko apostua-

rekin prozesuan aitzinerat egiten saiatzen ari da eta horretarako Euskal Herriko eragileen arteko indar metaketa eta nazioarteko komunitatearen inplika-zioa bulkatzen ari da.

Indar metaketarena, bertzalde, aliantza strate-giarekin, fase politiko honetan giltzarria da. Zeren fase hau ez baita prozesu demokratikorat muga-tzen, Independentziaren eta Sozialismoaren bidean eragiteko estrategia berritua da eta horretarako, pausuak emateko eremu desberdinetan: erakun-deetan, jendartearen, sindikal gintzan eragile ezkertiar eta subiranista desberdinen arteko indar-metaketa nahitaezkoa da. Horrekin eta konfrontazio demokra-tikoarekin: desobedientzia forma desberdinak har-tu ditzakeen masa borroka eta borroka ideologikoa, eta erakundeetako jarduerarekin gure helburu es-trategikoetan aitzinerat egiten dugu.

Orain artio indar metaketarena eremu politiko-instituzionalean ikusi da argien, baina kontzeptu hori bera eremu desberdinetarat eraman beharra dago, zeren erakundeetan parte hartzea nahitaezkoa iza-nagatik, horrekin soilik ez baita aski.

Illo horretan bizi dugun krisi testuinguruan eta askapen prozesuan urratsak emanez martxoaren 29an Euskal Herrian izandako greba orokorrak ali-maleko argazkia utzi zigun. Modu berean krisiari ezkerreko erantzuna emateko ezker subiranistaren eremuan bildu diren alderdiek (Ezker Abertzalea, Eusko Alkartasuna, Aralar eta Alternatiba) proposa-men sozioekonomiko gauzagarri eta errealista aurkez-tu dute eta www.irtenbidea.net -en osorik aurkitu daiteke. Bertzalde eta, fase politiko berriari buruz, Ezker Abertzalea berrantolaketa prozesu batean sartu da. Oraino Sorturen legeztapena argitzeko dago, eta gazte mugimenduak jasaten duen jazar-penak irauten du. Nolanahi ere den ondoko hilabe-tetan Sorturen eratze prozesua, gazte mugimendua-ren berrantolatzea eta LAB sindikatuaren biltzarra egiten dira. Hiru prozesuetatik fase berrirako Ezker Abertzaleak beharko dituen erakunde berrituak ate-rako dira.



herritarren Baztan. eraiki

